

# Joancha

## letoi leinjiin

---

### Ichaonaa esine tera erenaa

**1** <sup>1</sup>Necoaunaa cana janonaane ajiniha inoaelu caje coauneein nesina, canacaanuhacha aonai, canacaanuhacha coarajei, naaonjoainne caa beein inara rai laenaain letoacaanu, canacaanu nota que coaraain, biji mucuhin, naaonjoacaanune jaun. Acate, ichaonaa chabana nitajenaa charanejeein nenea esine tera Erenaa ne. <sup>2</sup>Canacaanu rene ecocohin iriha nii ichaonaa esine chabana sanaacharanejeein nenea terane jaunna, inara rai nii que ereerecaanu. Acate, Inaca Cana Coaunera aina nelu. Nii jianeein ratiriin turuhinte, canacaanu aina neein, jianacoon teteriin satiiin rai beebeje, amuhemujueein itolere sacutaain. <sup>3</sup>Nitohaneeinte itolere ichaain satiiin cachaauru notajae. Niine canacaanu raajenhane coaraain beebejihacaanu, inara netonai canacaanu aina jiniiquiin esenetaain neeichene coina. Charijieein teeinti canacaanu, Cana Inaca Cana Coaunera, rai Calaohi Jesocurisito, naaonjoain aina jiniiquiin nihacaanu, nii rijijieein inara netonai canacaanu aina jiniiquiin raotojoeein neeichene coina. <sup>4</sup>Nii jaunna, jitariin beein inara rai laenaain caa letoacaanu, inara netonai coitucuhin neeichene, raotojoeein

rachoojoeein jiniiquiin nihacachene coina.

### Cacha cononeein niha Cana Coaunerane

<sup>5</sup>Caa erenaa- canacaanu relaa Jesocurisitone jaan- inara rai canacaanuhacha beebejeite, cacha cononeein niha Cana Coaunerane jaun, nota beroteniha cachaacha ichaine jaan ne. Nihei charijieein niha natiin jetao, que nasina nainihe chaelai, Aca itolereenein baaso ichaain nihacachene nii coarajeein nihane jaun. <sup>6</sup>“Ainate jiniiquiin nihacache,” naain irihacachene saijieein, asiin canaacha jerei ichacaache suujueeinete, cana raajenhane nohanein necoritarichacheein. <sup>7</sup>Nete laen satiiin acatiha cana ichao teteriin aiha Cana Coaunerane rijijieein asinojoinelanaala chachaain jiniiquiin ita suujua rijijieein nihacachene, cana osa culeereein rai coichana que rai Calaohi Jesocurisito.

<sup>8</sup>“Chatohanai baaso ichahaan. Coatiha chaque osaojoeehaun,” naain irihacachenete, cana raajenhane necoritarichacheein. Cuute casajenetiin nedarichacheein. <sup>9</sup>Jana laen chatohaneein baaso ichaain nihacachene, suujuelanaala beein, Cana Coaunera nitohanei rucuhaneein nihane que jaecohacachenete, cana osa coreniha

caseteco coaracaachene rai nihacachene caje, cana que suujua acatein, itolere baaso ichacaachene berotiha cureein cana caje Cana Coaunera. <sup>10</sup>“Chaaelai janonaa bana, chatohaneein naosatein nihaaun,” naain irihacachenete, Cana Coaunera ere tonoraene richaacheein. Cuute casaje tocokanein Cana Coaunera ratiririchaacheein.

### **Cana Coaunera acatiha cana rai cha rucucheranu Jesocurisito**

**2** <sup>1</sup>Cana Coaunera coreniha cacalabi rijijieein nenacaauru, nabana Cana Coaunera ere lachin, chatohaneein nosatein neeichene coataane catohaneein laenaain letoaaun. Chunocoha chatohaneein baaso ichaain osa que nesaruhin nihane, niha cana rai Cana Coaunera acatiha nii rucucheranu Jesocurisito- esinae rauhijiriin caohacha esine coitucuhin rucucheraneein nena. <sup>2</sup>Osaotohacachene caje cana que suujua acatiha Cana Coaunerane cointate raajenihane netelu Jesocurisito, coroso que teein atinaauruhane coina. Coatiha leinjiin cana corenihacha aiheilul. Satiin caa chauratane sacutaain que nenacaauru caje osa berotihane cointate nitohaneein nelu.

<sup>3</sup>Esinae rauhijiriin naitoonjoan tonoraacachenete, esinae rauhijiriin Cana Coaunera coitucuera nihacachene coitucunaa nainerichaacheein. <sup>4</sup>Jana tabaauru: “Cana Coaunera coitucuhanu,” naa natiin naitoonjoan tonoraenihanete, nechu jataain casajenetohane jaun aitoreein. <sup>5</sup>Esinae rauhijiriin, nere tonoraerate esinae rauhijiriin Cana Coaunera belaichaneein nihane coitucunaa nainereein. Nii ainate esinae rauhijiriin jiniiquuin, aina nihacachene coitucunaa nainichaache. <sup>6</sup>Chunocoha “Jeriha Cana Coaunerane rijijieeine ichaaon,” naain erei, nii

ichaohalu Jesocurisitone rijijieein ichaohine.

### **Ena nena Cana Coaunera aitoonjoan**

<sup>7</sup>Chasocuru, caa inara rai canuhacha laenai canuhacha letoai- Cana Coaunera aitoonjoan, coatiha ena ecoonaneein nihei. Acate inoaelu caje coaunein, inara rai beratenojineein nenaane. Nii Cana Coaunera aitoonjoante, inae inoaelu caje coaunein inae inaraacha aonai ne. <sup>8</sup>Nete laen, caa ena inara rai quiicha laenai quiicha letoaite, ena Cana Coaunera aitoonjoan- ena nena ne. Esinae rauhijiriin Curisito aina jiniquiin nena neein, inae nocohena caje mituhajeein, jihanacoo jiichoo mituhichene jaunte, inara raajenihane nii coaraain coitucunaa naineriquicheein.

<sup>9</sup>“Cana Coaunera cono conohanau neeinne, jianacoon teteriin chachaain neeun,” naa natiin nejelau namute cacha belainiha chunocohanete, jaiti moconajaera aina nocoenaana nihane jaun aicheein. <sup>10</sup>Chunocoha nejelau namute cacha belaaain neite, jianacoon ichaohane coaratiha aicheein. Nitohaneein ichaohane nerinaain chuni osa que sarunaa nainera. <sup>11</sup>Jana, namute cachaauru aina nejerateein belaiheite, nocohenaana joenreein moconajaera aina jaiti amuhemujue aiha maosane rijijieein, nii nocohena rai suujua aninoane jaun.

<sup>12</sup>Nii jaunna, cacalabihuru rijijieein neiniquichene rai caritiin rauhijiriin inara rai beein laenaain letoaaun, inoaelu beratihalune tocokanein nere nainaane coina, Acaneein nihane aina cuaain inara caje inara osa beroteratiha Cana Coaunerane coitucuhichene coina. <sup>13</sup>Saain ichauchenaauru, inara rai netonaina caa laenaain letoaaun, inoaelu caje coaunein nii nesina

coitucuhin neeichene jaun. Saain enamanacaauru raine maajeeinna, caa caritiin laenaain letoaaun moconajaera amuritiin ichoae iniichene jaun.

<sup>14</sup>Cana Inaca Cana Coaunera coitucuhin neeichene jaunna, caa caritiin inara rai laenaain letoaaunra cacalabihuru. Saain inara ichauhena-neeichene raine maajeeinna laenaain letohacaanu, nii inoaelu caje coauneein nii nesina coitucueraneein neeichene jaun. Saain enamanacaauru raine maajeeina letoaaun, chaae inara coichana aina cutaain Cana Coaunera Ere esenetaain, caohachaain laraajiin moconajaera choae iniichene jaun.

<sup>15</sup>Coa nechú jataain cacha sarueraanu que caa chauratane curuaanaa moconajaera tenojoin nichaae inara suujua letoaache. Chunocoha nii moconajaera tenojoin itolere nichaae suujua letoaerate, nechú Cana Coaunera que jaolequiin belainihane jaun aicheein, <sup>16</sup>Cana Coaunera caje nenea neniha nii chauratane que tenojoine jaun. Nii chauratane que tenojoite, nechú jataain osa que cacha sarueraanu que nenea ne. Acate cana nota rai caohati tocohanihane nichaae suujua letoaera, niicha sirii aina cuaain leeochoaauru amurijiriin nenea coacuhin, naonjoaain niha cachane jaan tera ne. <sup>17</sup>Nete inae cuu tihane bana, chauratane aina jiniiquiin nitajihá curreein, nii satiin cacha sarueranu tera moconajaera. Nete laen chaaelai janonaa bana nitajenaa charanejeein niha cuurureein Cana Coaunera jerenohi ichajejin ichaonacaauru.

**Esinae rauhijiriin nohanelanaala niha leinjiin ereine, nii caje mitunaa naineniha casajene.**

<sup>18</sup>Aonacuche cacalabihuru. Inae besaute nichaae cuujiha cana janonaa.

Nii jaunte, inae uhe lalaje nii Curisito aina nejerateein nenea cacha cairichaera moconajaera. Nitohaneente, inae caa arajiin ocoojoacoaure Jesocurisito que nejerateein nenacaauru. Nii cajete inae besaute nichaae cuujiha cana janonaane coitucuhacache. <sup>19</sup>Cana ainate neeure-rejete niqí, nete mituhin amuurelu cana caje. Coatiha acauru, cana suujua rijijieein coacuhin neeurehílu. Baana cana suujua rijijieein coacuhin aihuruhalunete enanetoojeein cana aina neeure. Nitohaneente neeurelu, acauru caje esinae rauhijiriin cana suujua rijitoojeein neeureniha cana aina nenacaurune coitucunaa coina.

<sup>20</sup>Nitohaneente inara rai Cana Coaunera Suujue tein nelu Curisito, aina cuaain inara itolere coitucuhin neeichene coina. <sup>21</sup>Esinae nohanelanaala erenaa niha Curisito que erenaane coitucueeneichene jauna caritiin inara rai laenaanu, coatiha coitucueeneichene jaun nihei. Nitohanihane jaun inarate coitucuhiche, casajenelanaala nenea caje mitunaa naineniha casajene.

<sup>22</sup>Aihana jaun, chateeinti casajenetiin ichoae, niite: “Canaacha cohajei Mesihasi nihei Jesocurisito,” naain Jesocurisito esenetaelanaala que erereein. Acatechu, nii rai Inaca Cana Coaunera aina rai Calaohi Jesocurisito batohin acauru que nejeratenaaneein ne. <sup>23</sup>Chunocoha cacha, Jesocurisito coitucunaa jerenihanete, acaentonai ranaa jerenereein rai inaca Cana Coaunera. Nete laen chunocoha, nii rai Calaohi Jesocurisito coitucuhin leeochoaauru que coitucuerateraneein nihane, acaentonai coitucuhin rareein rai Inaca Cana Coaunera.

<sup>24</sup>Nii inoaelu caje coauneein, inara rai beratenojoin inaraacha aonai rucujueein sirichuche, inara suujua cuhaneicha.

Chaen jiaohine Cana Coaunera Calaohi caje naluhichene. Aihate Cana Coaunera caje netonai naluheneeiche. <sup>25</sup>Nii cana rai tihane caina aitoha Jesocurisitone jaante chabana nitajenaacharanejeein nena ichaonaa esine ne.

<sup>26</sup>Nabana inara coritacuruha nii inara coritana jereraaurune coataane, caa inara rai aitiin laenaan. <sup>27</sup>Nete laen inara, inara relain inara suujuateranu lateneeiche, Jesocurisitohacha teratenojoin, Cana Coaunera Suujue siriin neeichene jaun. Nii inara rai niicha teratei Cana Coaunera suujuete, caohachaain rauhijiriin inara relaa cureein, inara suujuateein. Inara rai cha bihane, coatiha nohanenaa nerinaain. Esinaete erenaa nereein. Aihana jaun, Curisito esenetaaichene jianena coacuelanaala aina jiniiquiin neein inara relaa rai Suujuene rijijieein ichaaoche.

<sup>28</sup>Aihana jaun cacalabihuru, enene caje coauneein, jiaohine Jesocurisito esenetaaichene jianein neeichene. Aihate chaque casiin necoatelanaala jiniiquin queecha jaaequiin, niheichu Jesocurisito que coejelanaala nihacache enacoauneein turu bana. <sup>29</sup>Inarate raotojoein esinae rauhijiriin caohacha ichaeranein ichaoha Jesocurisitone coitucuhin neeiche. Nii rijijieein techu, baaso ichaelanaala esinae rauhijiriin caohacha nejesina ichara cacha, Cana Coaunera calaohineein inae nihane coitucuhin neeiche.

#### **Cana Coaunera calaohineein nenacaauru**

**3** <sup>1</sup>Aonacuche. Jataain mainajeein cana belain niha Cana Inaca Cana Coaunerane que nainain coitucuhin neeuche. Nii jaunte nainecure, Cana Coaunera calaohi inein cana curuaateuruha cachaaurune, esinae rauhijiriin acaneein nihacachene jaun. Nii jaunte cana coitucuhin, cana belain cana coaana nainecurene caa chauratane que

nenacaauru cachaauru Cana Coaunera coitucuuenehane jaun. <sup>2</sup>Canejeraauru, inae esinae Cana Coaunera calaohi neeinte nihacache. Nete nii baiha: “Naojoiin ineente niha curichachein,” naain rauhijiriin coitucuenihacache. Leinjiin, coaiteen enacoauneein cau turuha Jesocurisitone bana, rijijieein niha curichacheinnete laen coitucuhacache, aitohane rijijieein, jerichanejeein coaraa curichacheinna jaun. <sup>3</sup>Satiin acaacha esenetaain queecha jaaequiin nenaate, raajenihane itolere baaso caje necoulucohin neeureein, baaso colane ichaoha Jesocurisitone rijijieein ichaauruhane caina.

<sup>4</sup>Nete laen, satiin osa que nesaruhin nenacaauru baaso ichaain neeure, baaso icharanein niha satiin osane jaun.

<sup>5</sup>Inara netonaite cana caje osa beroteraanu que caa chauratane que turuhalu Jesocurisitone raotojoein coitucuhin neeiche. Coatiha Aca charijieinniji chaque osaaojoejein niheilu. <sup>6</sup>Nitohanihane jaun, Cana Coauneraacha jerei ichajeein jianelanaala nenaate, osa que nesaruna nainenereein. Nete osa que nesaruhin nenacaauru, coaracuruhane niha natiin chabana coitucuueneereein, nii jaun coatiha rai cacha necururinaain. <sup>7</sup>Coa inara coritaain neeuruha nejelau cachaaurune esenetaain nihachera cacalabihuru. Chateeinti baaso que jaolequiin caohacha nejesina ichae, niite caohacha ichara ne, aiha nii caohacha nejesina icharane rijijieein.

<sup>8</sup>Chateeinti osa que nesarujueein ichoae, nii te moconajaera rainein nihane jaun aicheein, inoaelu caje coauneein osa neba niha moconajaerane jaun. Nii jaunte caa chauratane que turuha uhelu Cana Coaunera Calaohi, nii moconajaera ichanaa itajeein beroteraanu que.

<sup>9</sup>Cana Coaunera coitucuin, Cana Coaunera calaohineein nenea, inae osa que nesarujueein ichaonaa nainihein, inae rai Cana Coaunera tenojo i chaonaa que ichaohane jaun. Chaen inae Cana Coaunera calaohi nihane jaunte, inae osa que nesarujueein ichaonaa nainene. <sup>10</sup>Coitucuno-joineeinte neure Cana Coaunera calaohichuru. Nii rijijieein techu coitucunojoineeinte neure moconajaera calaohichuru, caohacha ichaelanaala, namute cacha belailanaala, naaonjoaain nenacaauru, Cana Coaunera cachaneein neureenihane jaun.

**Leeochaauru aina jiniiquiin  
ita belaa inihacane**

<sup>11</sup>Caate nitohaneein nihacachene coina: “Jiniiquiin ita belaa in, leeocha cachaauru niha natiin belaa in, naaonjoaain ichaaoche,” naain inoaelu caje coauneein beratenojoineeinte nenea ne. <sup>12</sup>Aihana jaun, nainihaacache moconajaera cacha neein nihalune jaun nocoala sohin jaohalu Caainne tocohaneein ichaohacachene. Chanuna nocoala sohin joae Caain. Caohachaain suujua coaraa nii rai nocoalane jaunte sohin joae, baasoneein ichaoha nii Caainne jaun.

<sup>13</sup>Inara belaihireniha Cana Coaunera coitucuuruhine coaa nii que nererajoecaache. Coatiha enaacha inaraacha coarai inerinaiinta canejeraauru. <sup>14</sup>Ohin nitajenaa rai nenea janate nii caje cana ichoterate, chabana nitajenaa charanejeein nenea ichaonaa que ichaohacachene coina. Nii jaunte cana amute cachaauru belaa in naaonjoaacache, inae raotojoeein coitucunaa jaun. Chateeinti namute cacha belaine, niite ohin nitaje rai nihane jaun aicheein. <sup>15</sup>Satiin namute cacha que jaolequiin nenacaaurute leinjiin nechu aansai sonajainein ne. Inarate raotojoeein

coitucuhin neeiche, nitohaneein nechu aansai sonajain nenea, coatiha chabana ichaonaa nitajenaa charanejeein nenea ranaa nainihe. <sup>16</sup>Coichana aina cutaain cana belaiha Jesocurisitona jaunte, Cana osa corenia coroso que neteein ohalune coitucuhacache. Nitohanihana jaunte, raotojoein jianacoon ichaoha cana amute cachane coina coreniha itolere necairichanaa abaantaain acaauru coroatajanein nihacachene caohachae. <sup>17</sup>Raotojoein ichaohane jaanu que coriqui siriin niha chunine jana, jataain cairichei inejeein coroatajanera lateein niha leinjiin namute cachane jana tenihanete, aina cutaain Cana Coaunera belainihane jaun aicheein. <sup>18</sup>Cacalabihuru, nainihe cana ereecha que cana amute cacha belaiha nocoetiin ereein nihacachene. Esinae rauhijiriin cana amute cacha belaihaacachene, niicha latei tein belaihaachenete ne.

**Chaque necoatoelanaala tonajelanaala  
Cana Coaunera acatiha nihacachene**

<sup>19</sup>Nitohaneein nenaate, esinae rauhijiriin ichaonaa chabana nitajenaa charanejeein nenea tera aina esinae nihacachene coitucuha curichaachein, Cana Coaunera acatiha nenea bana. <sup>20</sup>Chatohanei ichaain nihacachene coreniha cana coulurujija cana suujuane sainejeeinte, canaacha ichai coitucueranein ne jianacoon cana tera Cana Coaunera, Aca itolere coitucueranein nihane jaun. <sup>21</sup>Canejeraauru, jana cana suujua cuhane chatohanein baaso ichacaachene coaracaachene jana, chatohanei ichaeniha cachene, Cana Coauneraacha que jaaequiin nacatiha nerichaachein. <sup>22</sup>Acate satiin canaacha bajai tereein, cana rai naitoonjoan tonoraain, Aca jerihane rijijieein chachaai nihacachene jaun. <sup>23</sup>Nitohanein tonoraain nihacachene coina cana rai naitoonjoante, rai Calaochi Jesocurisito esenetaain, le

catcha nichaachene jiniiquiin ita belaa in ichaohacachene coina ne. <sup>24</sup>Satiin naitoonjoan tonoraain nenacaaurute, nii naitoonjoan jianena coacuelanaala, aina jiniiquiin neeuruhane jaun, acaentonai acaauru aina ichoae. Nitohaneente cana aina ichaohane coitucuhacache, cana que coitucueratiha nii cana rai niicha tei rai Suujuene caje.

#### **Cana Coaunera Suujue aina nejeratiha moconajaera suujuene**

**4** <sup>1</sup>Aonacuche canejeranein cacoelai-chauruna caa que erete aonaquiche. Coa Cana Coaunera letono niha nocohetiin inara rai satiin erenacaauru esenetaain nihache. Nitohanein inara coritana jerera nihane, esinae rauhijiriin Cana Coaunera Suujue sirichuruhane coitucuhichene coina coujunajaain coaranaacuche, jataain lanaeniha arajiiin caa chauratane que casajeeurune jaun, tabaauru cana Coaunera letononiha nocoetiin ereruhane jaun. <sup>2</sup>Nitohanein coujunajaain coaranaacuchene, esinae rauhijiriin Cana Coaunera Suujue siricha coitucuriquicheein. Satiin, cachanein turuhin nejanoaalu Jesocurisitone coitucuhin nenacaaurute, esinae rauhijiriin Cana Coaunera Suujue siricheein. <sup>3</sup>Jana nitohanein niha Jesusone coitucunaa jerelanaala nenacaauru, coatiha Cana Coaunera Suujue siririnaain. Leinjiin Curisito aina nejeratena moconajaera suujuete siricheein. Inarate coitucuhin neeiche, inara uricho que bera aonaain naonjoaain neeichene jaun. Nii moconajaera suujuete inae caa chauratane que turuhin ne. Acate Curisito que nejeratena nera cacalabihuru.

<sup>4</sup>Jana inarate Cana Coaunera Suujue siriin neeichene jaun, nii casajeeuru ichoae inii neeiche. Nii inara suujua cuhane inaraacha siriite, jataain mijiaainetiin ne, caa chauratane que nenacaauru rai

tenojoin ichoae jauhecotojoeriin. <sup>5</sup>Acaaurute jelai teein caa chauratane que nenacaauru neein neeure. Nii jaunte raujiaain caa chauratane que nenacaauru itolereeicha que ereereecure. Nii jaunte acaauru ere aonaain esenetaain tonoraauru acaauru rijijieein caa chauratane que nenacaauru cachaaauru. <sup>6</sup>Jana canate Cana Coaunera caje nena nichaache. Nii jaunte Cana Coaunera coitucuurera, cana ere aonaain tonorae. Jana Cana Coaunera coitucuuruhite cana aohana jerene. Niicha cajete nainacaache, “Acate Cana Coaunera Suujue siri. Jana acate casaje moconajaera suujue siri,” naain coitucunaa nainichaache.

#### **Jataain catcha belaiha Cana Coaunerane**

<sup>7</sup>Canejeraauru, coanete cana laurijiracuru, chaen nejelau cachaaauru, naonjoainuri belaa in nihacache, Cana Coaunera caje coauneein unaaniha ita belaihaachene coinane jaun. Satiin nitohanein namute cachaaauru belaiatche Cana Coaunera calaohineein ne. Niite esinae rauhijiriin Cana Coaunera coitucureein. <sup>8</sup>Chateeinti namute catcha belaine, niite Cana Coaunera coitucue. Cana Coaunera coitucuera, aiha Cana Coaunerane rijijieein jataain catcha belaihane jaun. <sup>9</sup>Cana quete jataain cana belaitohane coarate Cana Coaunera, caa chauratane que acaihanejeein rai Calaohi letoain, nitajenaa charanejeein nihacachene coina. <sup>10</sup>Belaa in cana arihacachene que ainaa tocohanein cana belaiha Cana Coaunerana jaunte Calaohi letoaelu, cana osa coreniha raajenihane onaa que netihane coina, nabana cana osa coreniha necairichanaa coataa, atiin cana ichoterate cana osa coreniha necairichanaa caje.

<sup>11</sup>Aonacuche canejeraauru. Nitohanein jataain cana belaa in niha Cana Coaunerane jaun, coanete cana netonai

cana laurijiracuru, nejelaauru, naonjoain belain nihacache. <sup>12</sup>Coatilha Cana Coaunera coaraain nihei chunei cacha niqui, nete, ita belaaain, cana laurijiracuru, nejelau cachaauru, naonjoain belaichaa-chene cana aina nereein Cana Coaunera. Nii cajete cana belaitoha Cana Coaunerane rijijieein ichaohacachene coaracurureein cachaauru. <sup>13</sup>Nitohaneainte aina nihacachene jana, acaantonai cana aina nihane coujunacanu que cana rai Suujue te Cana Coaunera. <sup>14</sup>Canacaanune, caa chauratane que osa caje cachaauru ichoteratihane coina, nii rai Calaohi letoaa Cana Inaca Cana Coaunerane coaraneein caa beebejihacaanu. <sup>15</sup>Satiin cacha, Cana Coaunera Calaoehineein niha Jesusone coitucuhin berate Cana Coaunera aina ne. Jana Cana Coaunera netonaite, aina nereein.

<sup>16</sup>Nitohanihane jaunna Cana belaiha Cana Coaunerane coitucuhin esenetaacaanu. Cana Coaunera cana belaichaneein nihane jaun, rijijiein namute cacha belaichate, Cana Coaunera aina ne. Jana Cana Coaunerate aina netonai ne. <sup>17</sup>Nitohaneeine esinae rauhijiriin jianacoo teteriin cacha belaaain nihacaanune jaun, chaaelai que casilanaala, chaque tonajelanaala nerichaanuhin, inae cacha coulurujuihane coina coaitee turuha Cana Coaunera Calaoehi Jesocurisito bana. <sup>18</sup>Esinae rauhijiriin cana amute cacha belaaain ichaohacachene, nihei chaque casiin ichaonaana jaanu. Ita belaaain ichaohacanete, jaoleneein ne nii cana casataera cana casetecaeraanu. Jana chaque casiin nihacachenete, cana amute cacha belai ichaoenihacachene jaun airichacheein.

<sup>19</sup>Canacaanune Cana Coaunera belaaain nihacaanu, aca jauriaanejein ichoaichaniha canacaanu belaaain nihalune jaun. <sup>20</sup>Chunocoha: “Canune Cana Coaunera belaihun,” naain iriha natiin, namute cacha belainihane, acate leinjiin casaje neba ne. Coaracuche

nachuhinti, notaracaae neeuruha nii namute cachaaurune saijieein acaauru belairiha. Nii jaun techu, nii amuritohe-riin Cana Coaunera belaina nainene, chabana coaraain esenetaenihane jaun. <sup>21</sup>Jesocurisitote cana rai: “Chateeinti Cana Coaunera belaaain ne, nii namute cachaauru belaaain neeine,” naain cana letoaain cana ratirilu.

**Canaacha esenetai aina cuaainte moconajaera amiritohacache.**

**5** <sup>1</sup>Satiin Cana Coaunera letoon Mesihasi niha Jesusone esenetaaurerate Cana Coaunera calaoehineein neeurureein. Nii cana inaca Cana Coaunera belaichate, satiin rai calaoehineein nenacaauru belaicheein. <sup>2</sup>Cana Coaunera belaichaache esinae rauhijiriinete, cana letoaane jaan icharichaachein. Nii banate Cana Coaunera calaoehineein nenacaauru netonai belaichaachene coitucurichacheein. <sup>3</sup>Cana Coaunera belaihanete, nii cana letoaane jaan tonoraain rijijieein chaachacaane ne. Niheichu coatilha caaintai ichaonaa nihein nii naitoonjoan. <sup>4</sup>Satiin Cana Coaunera calaoehineein nenacaaurute, chauratane que nenacaauru itolere baaso choae ini. Satiin nii canaacha esenetaite cana suujua lararajiain cana corootajane, chauratane que nenacaauru cana que nejeratenacaauru amuritoeraneein nihacachene coina. <sup>5</sup>Cana Coaunera Calaoehineein niha Jesusone que jaequiin nenaate, caa chauratane que nenacaauru moconajaera letonocuru amuritoreein.

**Caa nichata laurii enaate,  
“Naaonjoaaineeinte ne Jesocurisito,”  
naain berane.**

<sup>6</sup>Cau chauratane que niha Jesocurisitone janate, acau que baotisa-

nojoinnein neein, coroso que ohin rai coichana jaohalune que, naaonjoain que cojunacatenohineein nedaclu. Cana Coaunera suujuete esinaaen nitohanihane coitucuerate cana que. Nii Cana Coaunera Suujuete chabana nohanelanaala cana rai beraneein ne. <sup>7</sup>Nichatajaainte neeure rai Suujue que, nii Aca nihane coitucuhin beracuru. <sup>8</sup>Nii coitucuhin nenacaurute, Cana Coaunera Suujue, acau, ichana, naaonjoainuri ne. Acaaurute ita suujua rijijieein beraneein neeure. <sup>9</sup>Cachaauru, cana rai nii acaauruhacha coarai beebejeeurane esenetana nainichaache niqui. Nete jataain nii amuritoeriin nelate, “Naaajoaan” naain biha Cana Coaunera, nii rai Calaohi que aitothane jaun. <sup>10</sup>Cana Coaunera Calaohi esenetaerate, esinae rauhijiriin aitoaha Cana Coaunera rucujueein siricheein suujua cuhane. Chateeinti Cana Coaunera esenetaene, niite casaje tocohanein Cana Coaunera tereein, Calaohi que aitoaha Cana Coaunera esenetaenihane jaun. <sup>11</sup>Nii erena cajete cana rai chabana nitajenaa charanejeein nena ichaonaa tiha Cana Coaunera coitucuhacache. Jana rai Calaohi Jesocurisitote nii ichaonaa chabana satonoelanaala nena teraneein nena ne. <sup>12</sup>Chateeinti Cana Coaunera Calaohi esenetaain ne, nii netonaite chabana ichaonaa nitajenaa charanejeein nena rareein. Jana Cana Coaunera Calaohi esenetaaite raenereein.

**Niicha letoai satonotihane rai acaauru suujuatiha Joanne.**

<sup>13</sup>Cana Coaunera Calaohi esenetaera niquichene raina caa caritiin laenareeunni, ichaonaa chabana nitajenaa charanejeein nena raeraneein neeiche inara netonaine coitucuhichene coina.

<sup>14</sup>Cana Coauneraacha quete jaeequiin nihacache, jeriha rai Suujuene rijijieein caje cha bajaain nihacachene cana rai nii canaacha bajai teraneein nihane coitucuhacachene jaun. <sup>15</sup>Nii caje cha bajaacachene aonaa Cana Coaunera coitucuhin nihacachene rijijieein techu, cana rai nii canaacha bajai terichaaene coitucuhin nihacache.

<sup>16</sup>Osa que nesarujuuha chunei cana nejerane coara chuneine, rai Cana Coaunera bajaaine. Aihate jianacoon osa caje teeine Cana Coaunera, jataain nitajena jaanu osa tabai nenihane. Jana nitajena jaanu que, jataain osa tabai que nesaruhi nei nihane, coa rai Cana Coaunera bajaache. <sup>17</sup>Satiin itolere osate baaso neein ne. Nete ne cacha itajeranune lanaala nena osa.

<sup>18</sup>Saain canate, inacaneein tein Cana Coaunera coitucuera, inae osa que nesaruna nainenihane coitucuhacache. Inae Cana Coaunera Calaohi que beraichaaen nihane jaun inae dadanaa nainihei moconajaera. <sup>19</sup>Canate Cana Coaunera caje nena nichaachene coitucuhacache. Jana caa chauratane sacutaain nenacauru Cana Coaunera coitucuuruhite satiin moconajaera bijiu neeure. <sup>20</sup>Chaen techu rai Inaca Cana Coaunera coitucuhin nena coina turuhin cha coitucuhin nihacachene jaanu tein cana que rai Inaca Cana Coaunera esine neein nena coitucuerateein nihalu rai Calaohi Jesocurisitone coitucuhin nihacache. Nii jaunte, nii esine neein nena rai Calaohi Jesocurisito aina ichaohacache. Acate Cana Coaunera esine neein, ichaonaa chabana nitajenaa charanejeein nena teraneein ne. <sup>21</sup>Caalabihuru caohachaaen necoeraain neeuche, nabana inara coritana coaacuruha nechua aansainein nenacauru, Cana Coaunera letononiha nocoetonacauru casajeeurune coataa.